



COMUNICÂT PE STAMPE

Cors di Istât di lenghe e di culture furlane. Une iniziative dal CIRF pai students dal Ateneu e des Superiôrs

Lezions in aule e incuntris sul teritori dai 15 di Lui ai 2 di Avost e dai 2 ai 23 di Setembar. Ae fin di ogni cors a son l'esam e l'atestât

Slargjâ la ufierte formative dal Ateneu pai students e l'horizont des cognossincis e des competencis dai fantats tacant de lenghe furlane e de culture dal Friûl. Cun chescj intindiments il **Centri Interdipartimentâl pal disvilup de lenghe e de culture dal Friûl (CIRF)** de **Universitât dal Friûl** al inmanee une gnove session estive dai cors gratuits di lenghe e di culture furlane pai students universitaris e par ducj i zovins interessâts.

Ogni percors al sarà strutturât in **siet lezions**, par un totâl di **vincj oris**. I prins sîs incuintris a saran di trê oris, intant che la ultime lezion, cuant che si fasarà l'esam finâl, e sarà di dôs oris. Un dai doi cors al scomençarà **ai 15 di Lui** e al larà indevant **ogni lunis e ogni miercus fint ai 2 di Avost, des 15.30 aes 18.30** inte **Aule T1 dal Palaç Garzolini Di Toppo Wassermann** (vie Glemone 92, Udin); chel altri, invece, si tignarà **dai 2 ai 23 di Setembar**, alternantsi tra **Palaç Antonini Cernazai** (vie Petracco 8, Udin) e **Palaç Garzolini Di Toppo Wassermann**, simpri cun orari **15.30-18.30**.

Intal program dai cors, dongje dai elements di fonde di grafie e di gramatiche e di cualchi nozion di caratar storic e su la produzion culturâl, a vignaran presentâts i imprescj informatics che a son a disposizion par judâ inte scritture dai tescj par furlan e si fevelarà ancje des manifestazions e des ativitâts indreçadis ai zovins.

Ae fonde de iniziative e je la cussience dal fat che la cognossince de lenghe furlane e dal Friûl e zove ae capacitât di cognossi e di capî il mont, cuntun ategjament pardabon interculturâl e multidissiplinâr. Par cheste reson, ancje chest an il sproc che al è stât sielzût par promovi i cors al è “No stâ fâ il barbezuan. Impare il furlan”.

La ativitât e ven fate cu la colaborazion de **ARLeF (Agjenzie Regjonâl pe Lenghe Furlane)**, de **Societât Filologjiche Furlane** e de cooperative **Informazione Friulana/Radio Onde Furlane**. In bande des lezions frontâls, a son in program ancje incuintris sul teritori, par esempi intes sedis de ARLeF e de Filologjiche e intai studis di **Radio Onde Furlane**.

Ducj i participants a varan un atestât di partecipazion. I fantats des scuelis superiôrs a podaran otignî il ricognossiment dai credits formatîfs pe ativitât extrascolastiche. Par informazions e iscrizions si pues contatâ il CIRF al numar **0432 - 556480** o mandâ un messaç di pueste eletroniche a **cirf@uniud.it** o a **sportel.furlan@uniud.it**.